

Van onser vrouwen lof


editie M. Gysseling

bron

Van onser vrouwen lof. In: Instituut voor Nederlandse Lexicologie (samenstelling en redactie), *Cd-rom Middelnederlands*. Sdu Uitgevers/Standaard Uitgeverij, Den Haag/Antwerpen 1998.

Zie voor verantwoording: http://www.dbnl.org/tekst/_ons014mgys01_01/colofon.php

© 2012 dbnl



[Van Onser Vrouwen lof]

- 1 Ne droech noeit ouer een
Sonder vrowe in v allene
Ghi sijt moeder ende maghet rene
Henne scint gheen wonder clene
- 5 Tgheselschap van desen twee
Ghi sijt ghods ende onse moeder
Bi v wart ghod onse broeder
Ghi sijt hauene anker roeder
Ons diet vresselike scaet
- 10 Die verdreuen sijn teverre
Inde sonden droue ende erre
Vrowe ghi sijt onse leedsterre
Ende onse beste touerlaet
Bi ons hebdi edele maegt
- 15 Dese waerdechede beijaegt
Want vrowe dat ghi crone draegt
Comt algader dor onse noet
Dit es openbare in scine
Om ons te loessene vter pine
- 20 Maect v ghod de moeder sine
Pent hier ombe dats ere groet
Roese bouen allen blomen
Vrowe nadien dat ghi sijt comen
Bi ons te derre groeter vromen
- 25 Dat ghod dor ons wart v kint
Ende wi bi v sijn ghenesen
Vander doet ende verresen
So dinct mi recht wel wesen
Dat wi v eeren ende ghi ons mint
- 30 Marie die ghode soghet
Fontaine die niet ne verdroeghet
Dit hebdi dicken ghetoghet
Andie sere hebben mesdaen

- Ghi sijt bouen allen inglen vrouwe
 35 Ghi verloest vt allen rouwe
 Die v met rechter trowe
 Willen wesen onderdae[n]
 Mine siele die es ghebonden
 Vrouwe met wel swaren sonden
 40 Ghi hebt die ghenade vonden
 Bedie so willic bidden v
 Om dat hic bem so mesdadech
 Dat ghi mijns sijt ghenadech
 Enter siele mede gheradech
 45 Jeghen vwen sone nu
 Al sijn groet mine mesdaden
 Ghi hebt so meenghen beraden
 Ende ghi sijt so vul ghenaden
 Ic hope so sere vppe dat
 50 Dat ghi mi niet nesult ghebreken
 Want ic ne hoerde noit spreken
 Dat ghi sonde wildet wreken
 Vp hem die ghenade bat
 Ghebiedt alse moeder boudelike
 55 Bidt alse dochter omodelike
 Den vader van hemelrike
 Want mine twifelt niet en twint
 Vrouwe wildijs v onderwinden
 Ghine sult mi wel ontbinden
 60 Ende ghine sult ghenade vinden
 Te miere behoeften an v kint
 Nv laet ons bidden te ghoder trowen
 Der maegt marien onser vrouwen
 Dat soe vter anxeleker noet
 65 Ons helpe int ende van onser doet
 Entat so si te onsen ende

?va

[Dat] ons de duuel [niet ne scende]
Dies ionne ons de hemelsce vader
Amen segt mede alleghader